

Набий алайҳиссаломнинг сифатлари



16:00 / 15.03.2023 3173

Абу Ҳурайрадан ривоят қилинади:

«У киши гоҳида Набий соллаллоҳу алайҳи васалламдан ҳадис айтганида:

«Буни менга киприклари узун, ёнбошлари оппоқ, юзлансалар, бутун гавдалари билан юзланадиган, бурилиб қарасалар, бутун гавдалари билан бурилиб қарайдиган, кўзлар ўхшашини кўрмаган ва кўрмайдиган зот айтдилар», дер эди».

Бу ҳадиси шарифда Расулulloҳ соллаллоҳу алайҳи васалламнинг бир неча сифатлари баён қилинган:

1. Набий соллаллоҳу алайҳи васалламнинг киприклари узун экани.
2. Набий соллаллоҳу алайҳи васалламнинг ёнбошлари оппоқ экани.

3. Набий соллаллоҳу алайҳи васаллам йўлда юрганларида қоматларини тик ва тўғри тутиб, кишига бутун гавдалари билан юзланишлари.

4. Набий соллаллоҳу алайҳи васаллам бировга қараганларида бутун гавдалари билан тўлиқ бурилиб қарашлари.

Набий соллаллоҳу алайҳи васалламнинг умматлари бўлмиш сиз билан биз ҳам йўлда юришнинг бу одобига риоя қилишимиз лозим.

«Одоблар хазинаси» китоби асосида тайёрланди